

Ni Presidente
Thomas S. Monson



Kasapulan ti Lubong Dagiti Nagkauna a Kameng Iti Agdama

Para iti kaaduan, ti panagdaliasat dagiti nagkauna a kameng ti 1847 ket saan a nangrugi iti Nauvoo, Kirtland, Far West, wenna New York no di ket iti adayo nga England, Scotland, Scandinavia, wenna Germany. Saan a naan-anay a maawatan dagiti babassit nga ubbing ti natibker a pammati a nangguyugoy kadagiti nagannakda tapno panawanda ti pamilia, gagayyem, gin-awa, ken seguridad.

Mabalin a saludsoden ti maysa a bassit nga ubing, “Inang, apay a pumanawtayo? Sadino ti papanantayo?”

“Sumurotka patpatgek nga anak; intayo iti Zion, ti siudad ti Diostayo.”

Iti baet ti kinatalged ti pagtaengan ken ti kari ti Zion adda ti naranggas ken napeggad a danum ti nadawel nga Atlantic. Asino ti makailadawan iti buteng a nangpekkel iti puso ti tao kabayatan dagiti makapeggad a panagballasiw? Naparegtada kadagiti naulimek nga arasaas ti Espiritu, natulonganda iti simple ngem natibker a pammati, nagtaleb iti Dios dagiti nagkauna a Santo ket naglayagda iti panagdaliasatda.

Iti kamaudiananna nakadanonda iti Nauvoo tapno laeng maipasangoda manen kadagiti rigat iti panagbaniagada. Dagiti lapida ti nangmarka kadagiti tanem iti intero a dalan manipud iti Nauvoo a mapan iti Salt Lake

City. Kasta ti pateg a binayadan ti sumagmamano a nagkauna a kameng. Naitanem dagiti bangkayda a sitatalna, ngem nagtalinaed dagiti naganda iti manayon.

Nabuntog dagiti nabannogen a baka, rumanitrit dagiti ligay ti karison, nagbannog dagiti natured a lallaki, napaguni dagiti tambor, ken nagungor dagiti lobo. Ngem nagtultuloy dagiti naparegta ti pammatina ken pimmanaw a nagkauna a kameng. Masansan a kinantada ti:

‘Maykay’ Sasanto; awan pagbutnganyo;

Arag-o ‘ti dalanyo.

Narigat man ‘toy panagdaliasatyo,

Parabur supapakyo. ...

Nas’yaat! Nas’yaat!¹

Nalagip dagitoy a nagkauna a kameng dagiti balikas ti Apo: “Nasken a masubok dagiti taok iti amin a banag, tapno maisaganada nga umawat iti gloria nga insaganak a para kadakuada nga isu ti gloria ti Zion.”²

Ti panaglabas ti panawen ti mamaglipat ken mangpabassit iti panangbigbigtayo iti pateg dagiti nakapadas iti nasaem a panagdaliasat, a nangpanaw iti naluaan a dalan dagiti awan nagnaganna a tanem. Ngem kasano dagiti karit iti agdama? Awan kadi dagiti nabato a kalsada a pagdaliasatan, awan kadi dagiti narusanger a bantay

nga ulien, awan kadi dagiti teppang a daliasaten, awan kadi dagiti dalan a parnuayen, awan kadi dagiti karanayan a ballasiwen? Wenno adda kadi pudno a kasapulan para iti dayta nga espiritu ti nagkauna a kinakameng a mangtarabay a mangyadayo kadatayo manipud kadagiti peggad a mangsalsallukob kadatayo ken mangiturong kadatayo iti kinatalged ti Zion?

Kadagiti dekada manipud pay iti gibus ti Gubat ti Lubong II, bimmaba a bimmaba manen dagiti pagrukodan ti kinadalus ti dayaw. Nagtultuloy nga immadu dagiti krimen; saan a disente ti pannakilangen dagiti tao ti kagimongan. Adu a tattao ti agkalkaligum a mangdadael iti panagnagato ken panagbaba ti biag, nga agkalkaligum iti di agpaut a ragragsak bayat ti panangisakripisio kadagiti rag-o ti kinaagnanayon. Iti kasta mapukawtayo ti talna.

Malipatantayo no kasano a nagtalinaed a naindaklan dagiti Griego ken Romano iti naulpit a lubong ken no kasano a naggibus dayta a balligi—kasano a rinimbawan ida ti kinasadut ken kinakapsut iti pannakadadaelda iti kamaudiananna. Iti kamaudiananna, malaksid iti panagtarigagayda iti wayawaya, tinarigagayanda pay ti seguridad ken naging-awa a panagbiag; napukawda ti amin—a gin-awa ken seguridad ken wayawaya.

Saankayo a sumuko kadagiti pangyugoy ni Satanas, ketdi, agtalinaedkayo a natibker para iti kinapudno. Dagiti saan a makapnek a tarigagay ti kararua ket saanto a mapatgan babaen ti di pulos aggibus a panagsapsapul iti rag-o iti baet dagiti ragsak ti panagrikna ken panagbisio. Ti bisio saan a kaano man agbanag iti naimbag nga ugali. Ti gura saan a kaano man mangitandudo iti ayat. Ti kinatakrot saan a kaano man mangted iti tured. Ti panagduadua saan a kaano man mangparegta iti pammati.

Adda dagiti marigatan a makadaer iti pannakauiyuyaw ken makainsulto a sao dagiti maag a tattao a mangkatkatawa iti kinadalus ti dayaw, kinapudno, ken panagtungpal kadagiti bilin ti Dios. Ngem kanayon nga imbilangen ti lubong a saan a napateg ti panagtungpal iti pagbatayan. Idi nabilin ni Noe a mangbangon iti bapor, timmangad dagiti maag nga agindeg iti awan ulepna a tangatang ket kalpasanna nagkakatawada

ken pinagsasaritaanda maipapan kadagiti napudno—agingga a dimteng ti tudo.

Nasken kadi nga adalentayo manen a kanayon dagiti kasta a napapateg a leksion? Agbalbaliw dagiti panawen, ngem agtalinaed ti kinapudno. No saantayo a masursuruan manipud kadagiti padas ti napalabas, ulitentayo manen dagitoy a buyogan ti amin a sakit ti puso, panagsagaba, ken nalaus a gurada. Addaantayo kadi iti sirib nga agtungpal Kenkuana a makaammo iti pangrugian manipud iti paggibusan—ti Apotayo, a nangisangrat iti plano ti pannakaisalakan—imbos a dayta serpiente, a manguyaw iti kinangayed daytoy?

Ti diksionario ilawlawagna ti kayat a sawen ti pioneer wenno nagkauna a kameng a kas “maysa a nga immun-una a mangisagana wenno manglukat iti dalan a surotan dagiti dadduma pay.”³ Maparegtatayo kadi uray no kaskasano ti bagbagitayo ti kinatured ken kinatibker ti panggep a nangiladawan iti kababalin wenno kinatao dagiti nagkauna a kameng ti immun-una a kaputotan? Iti aktual a kinapudno, makapagbalinkayo wenno makapagbalinak kadi a pioneer wenno nagkauna a kameng?

Ammok a makapagbalintayo. O, kasapulan ti lubong dagiti pioneer wenno nagkauna a kameng iti agdama!

DAGITI NAGADAWAN

1. “Come, Come, Ye Saints,” *Hymns*, no. 30.
2. Doktrina ken Katulagan 136:31.
3. *Oxford English Dictionary*, 2nd ed. (1989), “pioneer.”

PANANGISURO MANIPUD ITI DAYTOY A MENSAHE

Ilawlawag dagiti nasantuan a kasuratan a dagiti home teacher ket nasken a “mangballaag, mangilawlawag, mangigunamgunam, ken mangisuro, ken mangawis iti amin nga umasideg ken ni Cristo” (DkK 20:59). Ibilangyo ti mangilawlawag kadagiti ballaag ken awis a linaon ti menssahe ni Presidente Monson kadagiti sarungkaranyo. Mabalina a kayatyo nga ilawlawag kadakuada dagiti wagas a mangilasin ken mangsurot kadagiti nalinteg a pagwadan, mangliklik kadagiti pangallilaw, ken masursuruan manipud kadagiti biddut dagiti dadduma. Saludsodenyoy kadagiti sursuruanyo no kasano a makapagbalinda a pioneer iti agdama.

AGTUTUBO

Pinaregta ti Pammati

Ni Maggi Earl

Diak kaano man malipatan ti pannagnak kadagiti arubayan ti Winter Quarters, Nebraska, USA, a nagnaedan dagiti nagkauna a kameng adun a tawen ti napalabas. Sagrado ti arubayan, dumani kasla sumarsarungkarak iti templo iti ruar.

Napno dagiti matak iti lua, a nagpalidem iti panagkitak. Nakitak ti maysa nga estatua ngem diak unay makita a nalawag dagiti pigura. Idi napunaskon dagiti luak, nakitak ti maysa a lalaki ken babai a nakalidliday unay dagiti rupada. Idi umasidegak, nakitak ti pigura ti maysa a maladaga a naipaidda iti tanem iti sakaananda.

Daytoy nga imatang ti nangpunno kaniak iti adu nga emosion: liday, gura, panagyaman, ken rag-o. Kinayatko nga ikkaten ti saem a narikna dagita a Santo, ngem nagyamanak iti dayta met la a gundaway iti insakripsiodan para iti ebanghelio.

Ti padasko iti Winter Quarters ti nakatulog kaniak a makaamiris nga ited ti Nailangitan nga Ama ti ebanghelio kadagiti annakna ken ipalugodna kadakuada ti

kinawaya a panangaramidda iti daytoy kas iti pagayatanda. Nakapagpili koma dagiti nagannak ti maladaga a nangala iti nalaklaka a banag. Ti panangsurot iti propeta ken panagbiag iti ebanghelio ket naidawat a kasapulan kadagitoy a nagkauna a kameng nga agtultuloyda uray no kaipapanan ti panangitanem iti anakda. Ngem pinilida nga innala ti ebanghelio iti biagda ken inawatda dagiti pannubokda. Nasursurok a ti dedikasion dagiti Santo iti ebanghelio ken ti determinasionda nga agtultuloy ket pinaregta ti pammati ken namnama—namnama para iti naraniag a masakbayan ken pammati nga am-ammo ida ti Apo ken mapaepena ti saemda.

Agnaed ti nagsurat iti North Carolina, USA.

ANNAK

Agbalin a Pioneer

Kuna ni President Monson a ti pioneer ket maysa a tao a mangipakita iti dalan a surotan dagiti daduma. Ania ti maaramidyo tapno maitakder iti no ania ti rumbeng ken agbalinkayo a pioneer kadagiti daduma iti komunidadyo ken iti pamilyayo? Isuratyo dagiti sungbatyo ket ibinglayyo dagitoy iti pamilyayo.



Pammati • Pamilia • Tulong

Panangisuro ken Panangsursuro iti Ebanghelio

Sikakararag nga adalenyo daytoy a material ken, no maitutop, ilawlawagyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapisga kadagiti kakabsatyo a babbai ken mangaramid iti Relief Society nga aktibo a paset iti bukodyo a biag. Para iti ad-adu pay nga impormasion, mapan iti reliefsociety.lds.org.

Ni Jesucristo ti apo a mannursuro. Impakitana ti pagwadan kadatayo bayat ti “panangisurona kadagiti babbai iti kaaduan ken iti tunggal maysa, iti kalsada ken iti igid ti baybay, iti abay ti bubon ken kadagiti pagtaenganda. Impakitana ti naayat nga asi kadakuada ken pinaimbagna ida ken dagiti miembro ti pamilyada.”¹

Sinuruanna da Marta ken Maria ken “inawisna ida nga agbalin a disipulona ken makiranudda iti pannakaisalakan, ‘ti nasayaat a bagi’ [Lucas 10:42] a dinto maikkat kenkuana.”²

Kadagiti nasantuan a kasuratan-tayo iti ud-udina nga aldaw, binilinatayo ti Apo nga “isuro iti tunggal maysa ti doktrina ti pagarian” (DkK 88:77). Maipapan iti panangisuro ken panangsursuro iti doktrina, kinuna ni Cheryl A. Esplin, maikadua a mammagbaga iti Primary general presidency, “Ti panangsursuro tapno naan-anay a maawatan dagiti doktrina ti ebanghelio ket maysa a proseso ti panagbiag ken sumangbay nga ‘ibinsabinsa, bilin iti bilin, sangkabassit ditoy ken sangkabassit idiy’ (2 Nephi 28:30).”³

Bayat ti panangsursuro, panagadal, ken panagkararagtayo, mangisuro-tayo nga addaan iti bileg ti Espiritu Santo, a mangidanonto iti mensahetayo “iti puso dagiti annak dagiti [lallaki ken babbai]” (2 Nephi 33:1).

Manipud kadagiti Nasantuan a Kasuratan

Alma 17:2–3; 31:5; Doktrina ken Katulagan 42:12–13; 84:85

Manipud iti Pakasaritaantayo

Impalagip kadatayo dagiti napa-labas a propetatayo kas babbai nga addaantayo iti napateg nga akem kas mannursuro iti pagtaengan ken iti Simbaan. Idi Septiembre 1979, indawat ni Presidente Spencer W. Kimball (1895–1985) nga agbalin a “sister scriptioners.” Agbalinkayo nga iskolar wenno nalaing kadagiti nasantuan a kasuratan—a saan a tapno mangibaba kadagiti dadduma, ngem ketdi mangitag-ay kadakuada! Iti baet ti amin, asino ti addaan iti ania man a nain-indaklan a tulong tapno ‘ipateg’ dagiti kinapudno ti ebanghelio (a mabalin nga awaganda kadagiti kanito ti panagkasapulanda) no di dagiti babbai

ken inna nga agar-aramid iti ad-adu a panangaywan ken panangisuro?”⁴

Mannursuro ken agsursurotayo amin. No mangisurotayo manipud kadagiti nasantuan a kasuratan ken kadagiti balikas dagiti sibibiag a propetatayo, matulongantayo dagiti dadduma pay nga umasideg ken ni Cristo. No makiramantayo iti proseso ti panangsursuro babaen dagiti napnuan kaipapanan a salsaludsod ken kalpasanna panangdengngeg, masarakantayo dagiti sungbat a mangipaay kadagiti personal a kasapulantayo.

DAGITI NAGADAWAN

1. *Daughters in My Kingdom: The History and Work of Relief Society* (2011), 3.
2. *Daughters in My Kingdom*, 4.
3. Cheryl A. Esplin, “Teaching Our Children to Understand,” *Liahona* ken *Ensign*, May 2012, 12.
4. Spencer W. Kimball, iti *Daughters in My Kingdom*, 50.

Ania ti Maaramidko?

1. Kasano a makapagsaganaak tapno agbalinak a nalalaing a mannursuro?
2. Iburburayko kadi ti pammanekneko kadagiti kabsat a babbai nga ay-aywanak?